

11 DEC 1998

Mahkamah-Anwar (Talqin)

ANWAR MINTA SIASATAN SURAT TALQIN DIHENTIKAN: SAC MUSA HASSAN

KUALA LUMPUR, 11 Dis (Bernama) -- Bekas timbalan perdana menteri Datuk Seri Anwar Ibrahim mengarahkan polis supaya menghentikan siasatan terhadap surat "Talqin Terakhir Untuk Anwar Ibrahim", seorang pegawai kanan Jabatan Siasatan Jenayah memberitahu Mahkamah Tinggi hari ini.

Anwar meminta siasatan itu dihentikan dengan alasan ia bercanggah dengan keputusan Perdana Menteri yang menyatakan bahawa perkara ini adalah fitnah, kata SAC Musa Hassan, pegawai siasatan dalam kes Anwar.

Anwar, yang juga bekas menteri kewangan, didakwa menggunakan kedudukannya untuk campurtangan dalam penyiasatan polis berhubung dakwaan salah laku seks terhadapnya.

Beliau didakwa mengikut Seksyen 2(1) Ordinan No 22 (Kuasa-Kuasa Perlu) Darurat 1970 yang membawa hukuman maksimum penjara 14 tahun atau denda RM20,000 atau kedua-duanya jika sabit kesalahan.

Musa, Penolong Pengarah Pendakwaan dan Undang-undang di Jabatan Siasatan Jenayah, Bukit Aman, adalah saksi ke-13 pendakwaan yang memberi keterangan pada hari ke-25 perbicaraan. Beliau mula memberi keterangan semalam.

Musa berkata Anwar memberi arahan itu di hadapannya, Pengarah Jabatan Siasatan Jenayah Datuk Ismail Che Rus dan Peguam Negara Tan Sri Mohtar Abdullah di pejabat Anwar di Jabatan Perdana Menteri.

Kepada soalan Timbalan Kanan Pendakwa Raya Azahar Mohamed, Musa berkata pada 9.30 pagi 30 ogos 1997 beliau menerima panggilan daripada Ismail yang beliau (Musa) dikehendaki mengiringi Ismail untuk berjumpa Anwar di JPM.

Ismail memberitahu yang mereka dipanggil oleh Anwar, katanya.

"Saya bersama Ismail ke pejabat Anwar di JPM. Semasa tiba di bilik tetamu, saya ternampak Peguam Negara Tan Sri Mohtar pun ada bersama. Kami tidak bercakap apa-apa semasa berada di bilik tetamu itu," katanya.

Katanya sebelum berjumpa dengan Mohtar, beliau dan Ismail tidak mengetahui yang Peguam Negara turut dipanggil ke JPM.

Musa berkata semasa mereka berada dalam bilik Anwar, Anwar bertanyakan berkaitan siasatan jabatan siasatan jenayah terhadap surat "talqin".

Beliau berkata beliau menjelaskan kepada Anwar bahawa polis akan menjalankan siasatan dengan teliti untuk mendapatkan keterangan sama ada tohmahan itu benar atau tidak.

"Saya menyatakan bahawa siasatan masih belum selesai kerana ia baru di peringkat awal," katanya.

Azahar: Apabila kamu beritahu tertuduh bahawa siasatan itu di peringkat awal, apa respons tertuduh?

Musa: Apabila saya menyatakan bahawa siasatan baru peringkat awal, tertuduh menyatakan perkara ini tidak perlu disiasat.

Pada peringkat itu peguam Christopher Fernando membantah atas alasan bahawa keterangan itu tidak relevan kepada tuduhan dan ia sangat berprejudis.

Beliau berkata keterangan itu tidak seharusnya diterima sebagai bukti.

Azahar menjawab bahawa keterangan itu mungkin tidak relevan kepada pembelaan tetapi relevan kepada pendakwaan kerana ia akan menunjukkan bahawa Anwar memberi arahan di hadapan AG dan pengarah CID.

"Yang pastinya ia relevan kepada kami untuk membuktikan tuduhan itu dan salah satu daripada ciri tuduhan itu ialah bahawa Anwar telah menggunakan kedudukannya dan keterangan ini akan membuktikannya," kata beliau.

Fernando berkata sama ada keterangan itu menyebelahi pembelaan atau

pendakwaan, ia bercanggah dengan peraturan kerelevanan dan tidak seharusnya diterima.

Beliau berkata tuduhan itu hanya melibatkan arahan kepada Mohd Said dan Amir, dan tarikh yang disebut dalam keterangan itu berbeza dengan tarikh tuduhan.

Paul bagaimana menolak bantahan itu kerana beliau berpendapat ia relevan untuk menghasilkan bukti memandangkan tuduhan itu menyatakan bahawa Anwar telah memberi arahan dengan tujuan memastikan yang beliau tidak akan didakwa.

Selepas mahkamah mengarahkan Azhar meneruskan soalnya Musa berkata: "Tertuduh tidak mahu disiasat kerana ia bercanggah dengan keputusan Perdana Menteri yang menyatakan bahawa perkara ini adalah fitnah,".

Beliau berkata dalam perjumpaan itu Mohtar ada memberi pandangan dan menasihatkan Anwar bahawa adalah lebih baik untuk pihak polis meneruskan siasatan dan sekiranya tohmahan itu dibuktikan tidak benar, tindakan boleh diambil terhadap orang yang menulis tohmahan-tohmahan itu.

"Di perjumpaan itu juga tertuduh menyatakan bahawa dia tidak mahu mengambil apa-apa tindakan ke atas Ummi Hafilda dan Azizan Abu Bakar," katanya.

Ummi Hafilda Ali ialah penulis surat Perihal Salah Laku Timbalan Perdana Menteri yang dialamatkan kepada Datuk Seri Dr Mahathir Mohamad. Surat itu disertakan bersama surat pengakuan bersumpah Azizan Abu Bakar yang mendakwa diliwat Anwar.

Azizan ialah bekas pemandu Datin Seri Dr Wan Azizah Ismail, isteri Anwar.

Musa berkata setelah perjumpaan itu selesai, Mohtar, Ismail dan beliau keluar dari pejabat Anwar dan semasa di luar pejabat itu, Mohtar telah menegur beliau dan Ismail mengenai sebab siasatan itu tidak dimaklumkan kepadanya terlebih dahulu "kerana ini adalah satu kes yang menarik perhatian yang melibatkan Timbalan Perdana Menteri,".

Sebelum itu Musa berkata beliau menerima satu salinan surat Perihal Salah Laku Timbalan Perdana Menteri bersama surat pengakuan bersumpah Azizan dari Timbalan Pengarah Cawangan Khas II ketika itu Datuk Amir Junus.

Katanya selepas menerima surat itu beliau ingin mengetahui kebenaran tohmahan yang dilemparkan terhadap TPM iaitu Anwar pada masa itu.

Setelah membandingkan surat itu dengan surat Talqin, beliau mendapati bahawa ia mengandungi tohmahan salah laku seksual dan homoseksual TPM.

"Saya tidak tahu siapa yang bertanggungjawab terhadap surat Talqin itu tetapi di muka surat lima dinyatakan bahawa ianya daripada pertubuhan-pertubuhan," katanya.

Setelah itu, Musa berkata pada 19 Ogos 1997, pukul 5 petang beliau membuat temujanji untuk menemui Anwar di kediamannya bagi merakamkan percakapannya berkenaan tohmahan-tohman yang telah dibuat ke atasnya.

"Saya ada merakamkan percakapannya," katanya.

Perbicaraan disambung Isnin ini pukul 9 pagi.

-- BERNAMA

NHD NMO